

LE SE NA CHELETE

KAPA LE SE NA HO REKA

 Ruri ke monyetla ho khutlela tabernakeleng, hoseng hona. Ke mpa ke ipotsa feela . . . Moena Neville o itse bongata bo motšeо ha bo a khona ho utloa. Na le nkutloa hantle haholo joale, motšeо mono? Na ho itōketse? Ke hantle. Ke a—ke monyenyanе, ke tlameha ho etsa lerata batho ba tsebe hoba ke teng.

² Ka hona, ke a hopola mohlang oo ke sebetsa Public Utilities. Ke ne ke nyoloha litepisi . . . 'Me ke roala libutšu tse khōlō tsa litonana, lipekere li hlahile, ka baka la mosebetsi oa lithapo tse holimō. 'Me ke ne ke nyoloha litepisi. 'Me Mof. Ehalt, e leng motsoalle oa ka, o ne a lutse swichibotong. 'Me ke a kholoa Mongh. Ginther mono a ka mo tseba, hantle haholo. Ka hona Edith a re, "Billy, u etsa lerata le le ngata ho fetisa, athe o mothoana feela, eo nkileng ka 'mona." Ke ntse ke qititsa ka lipekere tse khōlō tsena, ke nyoloha litepisi.

³ Ka re, "Be, Edith, ke monyenyanе haholo, ke tšoanelа ho ellisоa mang le mang hore ke teng, ka ho etsa lerata."

⁴ Be, ke sa tsoa kena feela ho letsа. Moena Neville o ne a mpoleletse a re motsoalle oa rōna ea lōkileng, Moena Roy Roberson, ha a tšebeletsong hoseng hona, o a kula. Ntho ea hae . . . Leino la hae le kumhile hampe. Le bakile tšoаetso, a tšoaroa ke feberu ea mofuta. 'Me o ile a tlameha ho ea le ntša, ke a kholoa, hang feela. 'Me Roy ebile ho kang ntate ho rōna mona, 'me re a mo rata. 'Me ke itse, "Moena Roy, ke—ke a kena joale, metsotsong e 'maloa feela, tšebeletsong." Ka re, "Ke tla kōpa kerekе 'me re tla u rapella, hoseng hona," 'me hosane a sa ile koo, ho sebetsana le lona. Leino le hotse le pelekane, kapa ho hong, le metse hampe, ba tlameha ho le khaola, ho le ntša.

⁵ Moena Roy ke mokaubere, joaloka ha le tseba bohle, oa Ntoa ea Bobeli ea Lefatše, o ne a thuntsoe maqhetsoana feela. 'Me hola e se be ho lōka ha Molimo, a ka be a sa phela. A se a robalitsoe har'a bafu, nako e telele; liphaka li phatlotsoe mona, le meomo e phatlotsoe, methapo e meholo e shoele bobeli. 'Me ngaka e itse, "Haeba a ka phela le ka mohla, a ke ke a hata khato le ka mohla." Ka mohau oa Molimo, o sebetsa letsatsi ka leng, o a hloa le ntho e 'ngoe le e 'ngoe. Molimo o bile mosa ho eèna hobane ke monna ea lōkileg, 'me re a mo rata. 'Me re, hakaalo ha re—ha re . . .

⁶ Haeba re phela hantle, ha ho bolele hore ha re hlaheloe ke mathata. Bonneteng, e bolela hore mathata ohle a re tobile. "Hoba matšoenyeho a ea lōkileng a mangata, feela Molimo o mo loela ho ona kaofela." Ke karolo e khanyang eo.

⁷ Ka hona re tla kōpela Moena Roy thapelo e ikhethang, hoseng hona. Ke a ipotsa ba bang ba teng ka mona, le hona, ba ka ratang ho rapelloa, ba ratang ho hopoloa polelong ea thapelo? Haeba ba ka phahamisa matsoho a bona feela. Ke hantle. Ke botle. A re emeng nakoana feela, ha le rata, re sa rapela.

⁸ Morena, re a tla kajeno, re qala ka sabatha. 'Me letsatsi le kena mocheng oa lona joale, ho haola le lefatše, ho hlahisetsa lintho tse reretsoeng joalo leseli le bophelo. 'Me qalong ea tšebeletso etsoe . . . Rōna re karolo ea Kereke ea Hao, e bilelitsoeng ho tšoara litšebeletso tsa pholiso, pholiso ea 'mele oa nama; ho tlatsa litabatabelo le litakatso tsa Morena oa rōna ea bokoang Ea ileng a hlabeloa makhopo a rōna, 'me re folisitsoe ke maqeba a Hae. 'Me re a kōpa, qaong ea tšebeletso, e sa thakhoha, ka lithoko, 'me lipelō tsa rōna li qala li phahamisoa, re ke re hopole, hoseng hona, Morena, moena oa rōna ea ratehang, ea theko e thata, Roy Roberson, mohlanka oa Hao ea ithobileng. 'Me re a tseba hoba U babaletse bophelo ba hae kantle koana mabaleng a ntoa, 'me Ua lōka ho eēna. 'Me kajeno o tubjoa ke mahloko, ha a khone ho tla kerekeng.

⁹ 'Me, Morena, e ne re ba sa rapela tlung ea Johanne Mareka, Lengeloi la kena tlung ea chankana, moo Petrose a hlahletsoeng teng, ha buloa menyako, ka mohlolo, 'me a ntšoa.

¹⁰ Oho Morena, U sa ntse u le Molimo. Mangeloi ao a laoloa ke Uena hoseng hona. Re a rapela, Morena, e re re sa rapela mona tlung ea Molimo, Mangeloi a theohele tlung ea Moena Roberson. Takatso ea hae ke ho nka malulo a hae mona, empa matšoenyeho a mo kateletse. 'Me Mangeloi a Molimo a mo loele, ho mo phekola, a boele a nke malulo a hae tlung ea Molimo.

¹¹ Ba bangata ba fetile maqakabetsing, ba—ba kutse. 'Me re bone leqheku la mosali, a lula setulong sa hae, a phahamisa matsoho a hae, athe o tšerema maoto. O tlie tlung ea Molimo, ho folisoa. Aba sena, Morena, a tsoe a tsamaea, ka mafolofolo a bocha le a mosetsana.

¹² Ba bang bohle ba phahamitseng matsoho a bona, ho phahame a mangata, hoba ho ngoliloe ho thoe, ebile e se e boletsoe, "Matšoenyeho a ba lōkileng a mangata, empa Molimo o mo loela ho ona kaofela." Kajeno re rurela hole ho kena tumelong, liphaka tsa tumelo, tse tlāng ho re loela maloetseng kaofela le mahlomola. E tle re ha tšebeletso e tsoile, ho se be le ea tšeremang har'a rōna.

¹³ Aba sena, Morena, mosalumele e mong le e mong e be molumeli. 'Me e re re sa nahanisisa Lentsoe la Hao, Moea o Halalelang o Le tšoare ho Le kenya lipelōng tsa rōna, le ho Le nosetsa mono Le tle le be le fetohē tholoana ea Lentsoe. Re etsetse sena, Morena, re sa inamisa lihlooho tsa rōna ka boikokobetso le ho e kōpa ka Lebitso la Jesu. Amen.

Le ka lula fatše.

¹⁴ Pejana ho keneloa molaetsa oa tšebeletso ea hoseng hona, ke rata ho tsetleha likellong tsa lōna, ho le atametsa ho feta. Haeba ba bang ba lōna le kene phomolong, 'me a batla ho etela e 'ngoe ea litšebeletso tse tla tšoaroa Middletown, Ohio, ho qala ka Mantaha, vekeng, e tla tšoareloa litšeng tsa ho kampa.

¹⁵ Na u tseba lebitso la litša tseo tsa ho kampa, Gene? [Moena Gene o re, "Ho itsoe ke limaele tse leshome le metso e 'meli kantle ho Middletown."—Mohl.] Moena Sullivan. Middletown ke motsana, o batla o tšoana le Jeffersonville mona. Ke setsi sa baseketebolo. Moena Sullivan ke molisa mono. Efe feelsa ea likereke tsa Full Gospel, etsoe li ka ba mashome a tšeletseng le ho hong li sebetsa 'moho kōpanong ena, li ka khona ho le bolella moo litša tsa ho kampa li leng teng.

¹⁶ 'Me ho tla hlongoa metlotloane e mengata mabaleng, ha ke bolelloa, ho hlokomela batho ba ratang ho tla. 'Me likopano li tla qala Mantaha ho haola le Moqebelo, matsatsi a tšeletseng. 'Me ha li ka ke tsa tšoaroa Sontaha, ka lebaka la likereke tse ling, ba tle ba khone ho tloha ho kenela litšebeletso tsa bona tsa tloaelo. Mohlomong, ho tla tšoaroa litšebeletso tsa pholiso, kapa ho rapelloe bakuli, bosiu bo bong le bo bong. 'Me e mong le e mong o menngoe. 'Me e tla qala ka Phato oa 10, ho haola ka la 15, Mantaha ho haola ka Moqebelo. 'Me haeba u le phomolong, 'me —'me phomolo ea hao e etla, 'me u batla ho e tšoara ka mokhoa oo, be, ehlile re tla thaba ho ba le uena.

¹⁷ Ke tla boela ke khothaletsa bohole ba esong ho kolobetsoe ka kolobetso ea Sekreste, ho sala hoseng hona le ho e nahanisisa. 'Me le hlophisetse tšebeletso e tlang ea kolobetso metsotsong e ka bang mashome a mane le metso e mehlano ho tloha joale, ke a kholoa. E tla tšoaroa mona kerekeng.

¹⁸ Re lemaletse joalo ho khothaletsa batho ho kolobetsoa ka kolobetso ea Sekreste, ka ho e tseba e le bohlokoia ho issa pholosong. Hobane e ngotsoe ke Morena oa rōna, thomo ea Hae ea ho qetela, thomo ea Hae ea ho qetela ho Kereke. Kapa, joaloka ha A laetse Kereke, qetellong, O itse, "E-eang ka lefatše lohle, le bolelle 'mopuoa e mong le e mong Evangelii. Ea lumelang a kolobetsoa o tla bolokeha." Ka hona re a tseba ho bohlokoia ho kolobetsoa ka ho quoelisoa.

¹⁹ 'Me re tla thabela ho le sebeletsa tšebeletso ena, mang le mang ea khotsoeng pelōng ea hae ho re Jesu Kreste ke Mora oa Molimo, O shoele ho pholosa baetsalibe, 'me O shoetse ho pholosa uena; 'me u ka rata ho tla le ho kolobeletsoa Lebitsong la Jesu Kreste tšoareleng ea libe tsa hao; ho bolella, lefatše, u lumela hoba libe tsa hao li lebaletsoe, 'me joale u tla fetoha morutoana oa Morena Jesu, ho nka kemo ea hao.

²⁰ Haeba u sa kene kereke efe, re tla thabela kōpano ea hao le rōna. Ha re na litho mona. Ke tabernakele e buletsoeng, 'Mele ohle oa Kreste, oa bolumeli bo bong le bo bong. Re eme

joaloka bolumeli bo sa khetheng nku ka pere. 'Me re bulela batho bohole menyako, ho sa tsottelehe ke bo mang, 'mala, morabe, kapa tumelo, mang le mang o amohetsoe. "Ea batlang, a tle." 'Me ha u se na kereke e 'ngoe, re ka thaba ha u ka tla kenela kopanō ea botsoalle le rōna. Ha ho ngolisoe letho. Kena feela ha menyako e butsoe, u kenele kōpano ea botsoalle le rōna. Ke phetho seo u se hlokang; tloo ka mokhoa oo feela. Tloo ka pelō e bulehileng, beha lehetla la hao lebiling, u re thuse re sa hahamalla 'Muso oa Molimo. Hoba, re a lumela hora, e haufi haholo, mohla tsohle tse boletsoeng ke Bibele li tla phethahala.

²¹ Ntle le pelaelo boholo ba lōna le balile Krushchev, setamente sa hae ho U.N., letsatsi le leng, ke se qotselitsoe se tsoa pampiring ea Canada, ke motsoalle. O itse, "Haeba Molimo a le teng, O se a le mothating oa ho hloekisa le ho fiela tempele hape, ho lōna makapitale, joaloka ha A entse qalong." Joale le ka bala lipakeng tsa mela, "O mothating oa ho fiela tempele hape." Koana lekomonisi le tšabehang hakaalo, le ka hlahisa polelo e joalo? O ne a tšoere taba, le hona. Ke hantle. E ne e le makapitale, qalong, ba hlahisitseng mathata. Makapitale ke rōna.

²² Ke utloile molisa oa rōna ea ratehang, Moena Neville, a etsa tlhahiso thelebisheneng ea hae . . . kapa khasong ea radio, hoseng ho hong, e mathileng kelellong ea ka, khafetsa le khafetsa. Ha ke khone ho e lebala feela. Ke ile ka e qotsetsa motsoalle oa ka, maobane bosiu. 'Me e ne e le ena, hore ho tla ba le . . . Hoba Moea o Halalelang o tlosoe, lefatšeng, borapeli ba kereke e fofo bo tla tsoelapele hantle, bo sa tsebe phapang. Na le kile, la . . . Ba e utloileng ba ba kae? [Phutheho e re, "Amen."—Mohl.] Na e ne e sa tsoa ka mahetla? Ha ba tsebe Moea o Halalelang, ka hona ba ke ke ba tseba mohla O tlohileng, 'me ba tla tsoelapele hantle feela ka ho tšoana. Mohla oa ho qetela a tiiselitsoeng 'Meleng oa Kreste, ba tla 'na ba tsoelapele, ba ntse ba leka ho sokollela meeä ho Oona, hobane ha ba tsebe seo O leng sona. 'Me marapeli a bona a fofo a tla tsoelapele joaloka mehleng. Joale, taba eo e ka tšoha e sa thophothele ho uena joaloka e entse ho 'na, empa ruri eo e ne e le polelo e tsoileng ka mahetla. Hoo, ba tla be ba le hole haholo, ka litemalo tsa moetlo feela, ebile ba ke ke ba hlolohela Moea o Halalelang, ka ha ba sa tsebe seo O leng sona, le ho qaleng.

²³ Molimo re hauhele. Moena, ke batla ho phela tjena bophelong bona, 'me takatso ea ka, haeba A khopisoa ke nthoana feela, nka e tseba pelōng ea ka. Ha nka etsa letho ho Mo khopisa, nka le utloa nakoaneng feela.

²⁴ Ha ke sa bua, ka bosieo ba Hae; mohla A leng sieo mona ha ke batla ho ba mona. Ke batla ke be ke falletse mohlang oo, e, monghali, setulo sa mohau se tla be se se na Mali. Se tla be se fifetse se kubella mosi se le setšo. Nqalo e halalelang e tla be e hloka Ramolao mono, ho buella nyoea ea rōna mohlang oo. Na le

a tseba Lengolo le rialo? Nqalo e halalelang e ne e kubella mosi. Setulo sa mohau se ne se se na Mali, ka hona ke kahlolo.

²⁵ Haeba Morena, a ratile mathoasong ana a mariha, ho re baballa ka tsoselsetso ea masiu a 'maloa. Ke e qetile kelellong ea ka feela, ke batla ho nka Buka eo ea Litšenolo, ho e hlahloba, ho theoha feela le ho haola Buka eo ea Litšenolo, ho tsoella.

²⁶ Joale, kajeno, ke tseba ho kene bongata, ho tla rapelloa. 'Me kajeno ofisi ea ka e ne e koetsoe, kapa vekeng ena. 'Me batho ba bang ba ne ba tlide, ha ba fumana monyetla ho rapelloa, kantle mane, hoba bashanyana ba ne ba chaisitse, letsatsi leo, ho phomola. Ba etsa mosebetsi o mongata; mosebetsi oa bona ka sebele, le mosebetsi oa tabernakele hape, le mehala ea ka le ntho e 'ngoe le e 'ngoe. E u tšoarisa methapo ka potlako. 'Me ke lona lebaka. Ke a tseba ke tlameha ho tsoela 'nqa e 'ngoe, hang ka nako, ho etsa ntho e fapaneng, le bona, ke tseba ba etsa hoo. Ka hona, ba ile ba ntetsetsa. Ka re, "Ke a kholoa ho tla itokela." 'Me re tla rapella bakuli, nakoaneng feela.

²⁷ 'Me ke ne ke hopotse re ka bala Lentsoe le seng le kae la Molimo. Haeba u tšoere Bibele ea hao joale, a re phetleng Bukeng ea Esaia. Ke rata ho le bona le tšoara Buka ea lōna le E bala. Ke bala... Leha re ka bala le le leng kapa Mantsoe a mabeli, feela, Ke Lentsoe la Molimo la Bosafeleng, le Hlolehileng. Le ke ke la feta le ka mohla. Khaolo ea 55 ea Esaia, sehlooho, "Poloko ea ka mehla."

Helang, lōna kaofela ba nyoriloeng, tloong metsing, le lōna bao le se na chelete; tloong, ithekelen, 'me le je; e, tloong, le ithekele veine... lebese le se na chelete le se na ho reka.

Horeng u ntsetsa ke'ng seo e seng lijo chelete? le ikhathaletsa ke'ng se sa khoriseng? mame lang hle, 'me le tla ja se monate, mee ea lōna e ithabise ka tse nonneng.

Sekehang litsebe, le tle ho 'na: mame lang, mee ea lōna e tle e phele; 'me ke tla le sitsa ka selekane sa kamehla sa mehau e tiileng, e baletsoeng le Davida.

²⁸ Ke rata ho qoqa le lōna, nakoana feela, ka temana: *Le Se Na Chelete Kapa Le Se Na Ho Reka*.

²⁹ Linthoana tsa boinyakalliso li ngata hakana matsatsing a rōna. Li ngata lintho tse hohelang batho nqa seo re ka se bitsang "menate," 'me li etselitsoe batho bohole, ba lilemong tsohle.

³⁰ Li teng lintho tse hapakang bacha, ea litantše tsa mehla ena le meketjana ea rokon-rolo, le 'mino o khemang le eona. 'Me e a hohela, ho ithabisa.

³¹ Ha ke tsotelle na ngoana o holetse lelapeng le letle ha kae, le kamoo a rutuoeng ho etsa hantle; feela ngoana eo ha a sa amohela boiphihlelo ba Tsoalo e ncha, 'mino oa rokon-rolo o qhautsa

maikutlo a hae ka potlako eo a o utloang ka eona. Hobane, ka ho eèna, ho tsoetsoe, ka tlhaho, moea oa nama. 'Me matla a diabolosi a maholo hakaale, kajeno, a qhautsa moea oa mothoana eo.

³² 'Me e tla hahlamela ba holileng hakakang, ke hona, ba hanneng Tsoalo e ncha! Hobane, ke ha feela bophelo ba hao bo fetotsoe, 'me u fetsotsoe 'me u tsoaloa bocha, 'Musong oa Molimo, tlhaho ea hao e tla itšalla e le ea lintho tsa lefatše, ho sa tsotelehe na u ka topeloa ke borapeli bo bo kakang, haese ha phethoho e kene ho uena. U ka rapela oa topeloa ke borapeli, empa matla a u hulang a tla itšalla, hoba le joale monna enoa oa khale oa sebe le litakatso tsa hae ha li eso shoe ho uena.

³³ Empa hang ha Kreste a hloella terone pelōng ea hao, lintho tseo ha li sa hlopha. E fetisa haholo ka boholo.

³⁴ Ha ke khone ho bitsa lebitso la monna eo, hona joale ha ke hopole lebitso la hae, empa bongata ba lõna bo ka mo hopola. Ho thoe banna ba ne ba lara sehlekehlekeng se itseng, e le leraba, ebe ho tsoa basali, ba binang. 'Me lipina tsa bona li ne li loea hakana, e ne re ha basesisi ba feta, ka likepe, ba fapohele teng. Ebe moo masole a ipatileng a na—a na khaoletsa basesisi bana ba sa itebetse, a ba fenethe. Teng eaba monna e mong e moholo o batla ho feta teng. A laela basesisi ba hae ho mo tlamella thupeng ea sekepe, le—le—le ho sunya selo molomong oa hae, a tle a sitoe ho hooeletsa; le—le ho kata litsebe tsa basesisi ba hae, ba tle ba se utloe, 'me ba sesise ba fete, ho utloa. 'Me basali ba tsoile, ba ntse ba tantša ba—ba hooeletsa, ba bina, 'me, oh, o ne o hlabosa hakaale, ho fihlela a tabotse letlalo la maqaqailane a matsoho a hae, a hooeletsa basesisi ba hae, "Fapohelang! Fapohelang!" Ba mpa ba sitiloe ho mo utloa, litsebe tsa bona li ne li katiloe ka lipako.

³⁵ 'Me eaba ba sesisetsa tulong eo ba tšoanelang ho mo tšoasolla, kapa, ho tlamolla matsoho a hae, 'me eèna a tla katolla litsebe tsa bona. Mono, ea re a sa tsamaea literateng, a utloa seletsi sa 'mino o mathemaloli o fetisang oo oa tlase mane, hoo mohla a na a feta khetlo la bobeli, ba itseng, "Oh, uena moralla naha oa senatla, ana re tla u tlamella thupeng ea sekepe hape?"

³⁶ A re, "Che, nteseleng ke sa tlangoa. Ke utloile ntho e hlabosang e fetisang ka boholo, ebile ntho eo ha e sa tla ntlhopha."

³⁷ O joalo Mokreste ea tsoetsoeng labobeli. Ba sibolotse ntho e khõlõhali ho feta rokon-rolo le boithabiso ba lefatše lena. Ba nyakallisoa ke Moea o Halalelang. E fetisa ka boholo hakaale, ebile ho bona lefatše le shoele.

³⁸ Empa ha u fapohela boithabisong bona bo theko e tlase, hopola u tlameha ho inkela chelete e ngata. Mohlankana ea ntšetsang kharebe ea hae meketjaneng ena le litantšeng tsena, le joalo-joalo, o tlil'o lefa moputso o mongata oa mokholo oa hae oa veke. Le batho ba baholo ba lekang ho fumana monyaka ka

ho etela matlo a thitelo, ho noa ho itebatsa mahlomola a bona a veke, ba tla tlameha ho lefa chelete e ngata. 'Me ba fumana'ng ho eona? Ha ba fole molemo oa letho haese pelō e robekileng.

³⁹ 'Me le hopole, u tla tlameha ho lōkisa litaba le Molimo ka letsatsi le leng. "Me moputso oa sebe ke lefu." Ha u finyelle letho mona lefatšeng, ka eona. Ke leseli la bohata. Ho noa ho phaella matšoenyeho. Sebe se tla phaella lefu holim'a lefu le leng. Bofello ba hao e tla ba karohano le Molimo, ka Bosafeleng, ho kena Letšeng la Mollo. 'Me u ke ke ua una letho, empa u tla lahleheloa.

⁴⁰ Ebe moo Molimo o fihlang o botsa potso, "Le ntšetsa ke'ng se sa khoriseng chelete ea lōna? Hobaneng le etsa joalo?"

⁴¹ Motho o chochoa ke'ng ha a batla ho etsa hoo? Ba sebelisa letlotlo lohle la bona, kuno eohle ea mosebetsi oa bona, ho reka seno, ho apesa mosali eo ba hloaelang le eēna, kapa nqa ntho e itseng ea lefatše, menyaka ea takatso.

⁴² Empa re bolelloa ka Bibeleng, re bile re mengoa ho tla ho Molimo, "Le ho reka thabo ea Bosafeleng le Bophelo Bosafeleng, ho se chelete kapa ho se ho reka."

⁴³ Lintho tseo ha li khorise, 'me bofello ba tsona ke lefu la Bosafeleng. 'Me e u ja chelete eohle eo u ka e phuthang, ho fetoha e—e motho oa motonana kapa monyakallisi, kapa moshanyana oa monyaka, kapa u ka ba eng, kapa ngoanana ea tummeng, kapa e ka bang eng. E tla u ja tsohle tseo u ka li phuthang, ho finyella hoo. Ho ikina ka liaparo tsa maemo a holimō, le—le lintho tse etsoang ke lefatše, feela ho kotula cheke ea tsuo ea Bosafeleng.

⁴⁴ Molimo o itse, ke hona, "Hobaneng?" Re tla etsa'ng mohla Letsatsi la Kahlolo, mohla re botsoang lebaka la ketso ea rōna? Ebe karabo ea rōna e tla ba efe? Karabo ea Amerika ea sejoale e tla ba efe, kanthebo ba ipitsa sechaba sa Mokreste? 'Me ho sebelisoa chelete e fetisang ho reka wiski, selemong, ho feta lijond. "Le ntšetsa ke'ng lintho tse joalo chelete ea lōna?" Koana, 'muso o ka u hlahela ntloanatšoana, ka didolara tse hlano tseo u li romeletseng tsamaiso e sa hlophisoang ka tšoanelo ho amohela makhetho, ho romela baromuo ba 'maloa mose ho maoatle. Re tla botsoa letsatsi le leng, "Hobane'ng u entse hoo?"

⁴⁵ Re sechaba sa Mokreste, 'me batho bao koo ba romelloa dibilione, re ntse re leka ho reka setsoalle sa bona. Joale ba se hlano hela. Ha ho makatse Khrushchev a itse, "Efēla ha Molimo o le teng, O tla boela a fiela paleisi ea Oona e hloeke." Bahetene ba ka hlahisa litatedemente tse joalo, ho re hlabisa lihlong. Ke bosaoana bo bo kakang! 'Me re ipitsa Bakreste.

⁴⁶ Molimo o itse, "Tloong, le ithekele Bophelo Bosafeleng, le se na chelete, le se na ho reka." Bophelo, ho phela kamehla, athe re Bo neha liholoholo tsa rōna re Mo tšeja sefahla-mahlo. Re tla etsa'ng ka Letsatsi lela? Ebe ho tla ba joang...?

⁴⁷ Molimo ha u batla re etse lintho, ho re neha chelete, ho re etsa sechaba se ruileng ho fetisa tlas'a maholimō, ke moo Molimo o tlang ho botsa seo re se entseng ka eona. Re ntsetsa ke'ng chelete ea rōna lintho tse sa khoriseng? Ha se ho sechaba feela, empa le ho batho ka bomong; ho qala ka dipeni, ho isa ho dimilione tsa didolara, e 'ngoe le e 'ngoe e tla arabeloa.

⁴⁸ Holim'a batho ba bolaeana: Ke balile seratsoana nakoana e fetyleng mona, e le ha bashanyana ba babeli ba sebetsa kampong ea ho tsoma. E mong a na le bana ba bahlano, e mong a na le ba babeli. 'Me e mong a tlameha ho nyaoloa. 'Me moshanyana e mong ea nang le bana ba babeli, kapa a na le bana ba bahlano, a utloa a hloka mosebetsi ho feta ea nang le bana ba babeli; 'me a tsoa ea tsoma le eèna, a mo thunya ka sekotlong.

⁴⁹ Chelete, ke mofuta oo oa sechaba, ke maikutlo a mofuta oo, ke mofuta oa moea o laolang batho.

⁵⁰ Le ka bona ke hona kamoo Tsoalo e ncha e lōketseng e be e hlokoa kateng. "U tšoanelo ho tsoaloa labobel." E tlamehile joalo. "Tloong ho 'Na, le reke le se na chelete."

⁵¹ U ke ke ua re, "Ke ne ke se na chelete." Ha u hloke chelete ea letho. E abiloe ho se tefiso.

⁵² Rōna Maamerika re lemaletse ho lefella ntho e 'ngoe le e 'ngoe. Ke lepetjø la rōna leo. "Re lefella lintho. Re tšoere chelete." Ho leketlisa didolara tsa lipampiri lichabeng tse ling, le joalo-joalo, tse futsanehileng. Ho kena, u bona bathori ba kena, ka masiba ohle le ka bokhabane. Maamerika a ba sebeletsa. Nyee eo ke leruo le litšila mahlong a Molimo. E ke ke ea lefella tsela ea rōna ho ea Leholimōng. Empa ntho e 'ngoe le e 'ngoe Amerika, re tlameha ho lefella tsela ea rōna.

⁵³ Ha u kena reshurenteng, u ja tinare ea hao. U sa behe chelete tafoleng, ho tipa moteki, sefahleho se a sosobana, athe o lefshoa ke k'hampani a e sebeletsang. 'Me bonnyane e mpe e be pheresente tse leshome, kapa ho feta, tsa molato oa hao. Ha u sa etse joalo, moteki a ka u qekolotsa eka holane o le molotsana kapa u le e-e lekhonatha. Athe, o a lefshoa. Ke nahana e le sekhobo le lihlong, ho etsa joalo. Ke hopola e le kahlolo e phoso holim'a sechaba. Ka tloaelo, batho ba lōkileng, litulo tse lōkileng, li ne li sa e lumelle. Empa ntho eohle e tšoasoa ke moea o le mong o moholo.

⁵⁴ Ke ne ke kena leetong, ka terene. 'Me molebeli... Ke tšoere potlolomente letsohong le leng, le sutuk'heisi ka ho le leng, ke suntse patana ea ho kuta lehafing, ke ntse ke tsamaea. Molebeli a nyoloha, ho re, "Na nka u jarisa?"

⁵⁵ Ka re, "Oh, ke ea feela mane tereneng, monghali. Ke u leboha, haholo." Lijarete tse ka bang, oh, mashome a mararō.

⁵⁶ A re, "Ke tla e nka," a nka nthoana eo a e phahamisa, a tsoelapele a tsamaea.

⁵⁷ Be, eitse ha a fihla, ka hopola mohlomong ke...ke tsebile hobane o a lefshoa, empa nka mo neha e—ho mo neha halofo dolara. A ka batla a ile a tšoara, liphahlo tsa ka, ntho e batlileng, ha re re, motsotso; bohole bo ka fihlang qetellong ea tabernakele ena, moo a ileng a palama terene. Ka hloella tereneng, pele, 'me ka nanabela feela ka e ntša. Ka mo neha halofo ea dolara.

A re, "Motsotso feela!"

Ka re, "Ke eng, monghali?"

A re, "Ke u jaretse mekotla e merarō!"

Ka re, "E, monghali, ke hantle. Ebe, phoso ke efe?"

⁵⁸ A re, "Ke lefisa bonnyane lisente tse mashome a mabeli le metso e mehlano mokotla. U nkolota lisente tse ling tse mashome a mabeli le metso e mehlano."

Le a bona, boo ke Boamerika, ntho e 'ngoe le e 'ngoe e tlameha ho lefshoa.

⁵⁹ Ha u tsoa u qhoba koloi u e lihela sekoting, u fumana motho ea u hulang a u ntša. U mpe u itōkisetse ho lefa, hoba ba tli'l'o u lefisa eona. Mofielo makoloi a 'mileng ha a tli'l'o u lata, o tla u lefisa hakana maele. 'Me ha e le sehoai, makhetlo a robong holim'a a leshome, ha a ntša terekere ea hae, ho tla ba hobe ho feta moo.

⁶⁰ U tlameha ho lefa eng le eng eo u e etsetsoang. Ntho e 'ngoe le e 'ngoe ke "Lefa! Chelete! Lefa! Chelete!"

⁶¹ 'Me athe sebe se kile sa u lihela sekoting se seholo ha kae! U ne u ka ntšuoa ke mang sekoting sa sebe le ka mohla? Empa Molimo o u ntša sekoting sa sebe, le sena chelete, le se na ho reka, athe ho be ho se mang ho u ntša.

⁶² Ha u sa lefe mofielo likotsi tsa mebileng ka botšepehi, u tla lula sekoting. U tlameha ho itholla chelete ho seng joalo u tla lula sekoting.

⁶³ Empa sekoti se tšabehang ho fetisa, ke seo diabolosi a u lihetseng ho sona, sekoti sa sebe le ho se lumele. Molimo o tla u ntša ka boithaopo, u se na chelete, u se na moputso. 'Me leha ho le joalo u robala sekoting, u kulupana sebeng feela, u sa bitse ho Èëna ho hang.

⁶⁴ Ha u laetsa mofielo likotsi tsa mebila, ka tloaelo ba leketlisa ketane e khōlō sekoting, ba e harela bampareng kapa joalo, ba qale ba hule. 'Matla a koloi a qala a hula, limoutoro li qala li phethoha, li u hula li u ntša.

⁶⁵ Molimo ha o u thola sekoting sa sebe, le ho utloa u bitsa ho Oona, O romela lehlaahlela le neng le hokeloe Kalvari, lerato la Molimo, ho Le tlama pelōng ea hao, le ho beha Matla a Moea o Halalelang mono, ho qala a hula. 'Me ha u a e lefisoa moputso oa letho. 'Me koana re rapalla sekoting hobane re sa khone ho e lefa ka lipokotho tsa rōna. Rōna Maamerika re hopola re ka e

reka ho tsoa lipokothong tsa rōna, empa u ka sitoa. Ke kantle ho chelete kapa kantle le ho reka. Ha u e lefe kerekeng. Jesu o e lefile Kalvari. Empa batho ba E soabela. Ba E batla ka mokhoa oa bona. Molimo o u betletse tsela ho E amohela, 'me Ke ea feela hola u ka E nka.

⁶⁶ Ka tloaelo, ha ba u hotolla sekoting, o mengoapo hohle, u tlameha ho nyoloha, ho isoa kokelong. 'Me pele ba qala ba u sebetsa, le pele ho etsoa letho, ba botsa, "Ke mang ea tla lefa molato? Haeba re rokella maqeba, haeba re tla tlola oli, le ho hlaba liente tse—tse u thibelang chefu ea mali, ebe u tšoere inshorentse ea mofuta mong?" Le pele ba etsa ntho efe, chelete e tlameha ho behoa tafoleng.

⁶⁷ Empa ha Morena oa rōna a tlama lehlaahlela la Hae la lerato pelōng ea hao, le ho u hula sekoting sa sebe, O folisa pelō efe le efe e robbehileng, ho hlakola sebe sohle. 'Me molato o lahleloa leoatleng la tebalo, ho se hhole o hopoloa khahlano le uena. "Tloong, le se na chelete kapa le se na ho reka." Ho sa tsotellehe kamoo o hlahlathuoeng habohloko, u tetekiloe habohloko hakakang, lelapa la heno le sebelitse joang, kapa seo u se entseng, ha ho lengolo la molato. O folisa lipelō tsohle tse robbehileng, ho tlosa mahlomola a hao kaofela. "Athe O hlabetsoe littlo tsa rōna, ho teteko ka baka la bokhopo ba rōna; kotlo e re tlisetsang khotso e Mo oetse holimō, 'me re folisitsoe ka maqeba a Hae." Ntho eohle e tlide lefeela.

⁶⁸ 'Me ha re batle ho E amohela, hobane re laola ke moea o phoso. Re laoloa ke moea oa sechaba, moea oa lefatše, sebakeng sa ho laoloa ke Moea oa Molimo, Moea o Halalelang, o re tsamaisang le ho re isa Linneteng tsohle, le ho phethisa Bibele joalo.

⁶⁹ Ha se khale mona, ha ke qoqa le mohanelia tumelo. O itse, "E nahane, Mongh. Branham. Holim'a bomalimabe bona bohle ba bophelo, re tšoere ntho e le 'ngoe, e re tlalehang re bolokehile, ke lingoloa tse itseng tsa sekhaleng tsa Bojuda."

⁷⁰ "Oh," ka re, "monghali, e ka ba phetho seo u se tšoereng, empa 'na ke tšoere ho fetang hoo. Ke ruile Moea oa Ea E ngotseng, o Le thasisetsang le ho Le kholisa le le joalo, tšepiso e 'ngoe le e 'ngoe." Eaba e a mo sita.

⁷¹ Le a bona, u tlameha ho tla tla reka u se na chelete, u se na ho reka. Ha u e lefisoe ka letho. Ke ea feela ho "mang le mang ea batlang, a ke a tle." Molimo o u nyolla sekoting.

⁷² Joaloka monna ea lutseng khorong e reiloeng e Lōkileng. Esale a liheloa sekoting, ho tloha polelong ea 'mē, ke diabolosi ea mo holofalitseng maoto. A iphelisa ka ho qela liabo bathong ba fetang. 'Me ea re a sa lutse khorong hoseng hoo, o bone ho etla bareri ba babeli ba pentekosta. Ba sa tšoara le daeme e le 'ngoe ho bona, hoba o itse, "Ha ke na silifera." 'Me daeme ke sekotoana se senyenyane sa silifera. "Ha ke na silifera le gauta."

⁷³ Ke a kholoa monna eo o hopotse ntho e kang ena. “Ha ke hloke ho ntša sejana sa ka.” Ha re re a ntse a leka ho boloka chelete e lekaneng. A le mashome a mane a lilemo, ha re re a ntse a leka ho boloka chelete e lekaneng, lingaka li ka mo bopela para ea liboreisi, ho tsamaea ka tsona, hoba, eèna, maqaqailae a hae a ne a tserema. ’Me koana a tlameha ho fumana chelete, ho e beha, pele lingaka li ka mo fa se mo tshetsang. ’Me ruri ha a hloke ho kokosetsa bareri ba babeli bana ba pentekosta ba se nang letho sejana sa hae. Monyetla, bao ba . . . ba futsanehile haholo, ho fumana peni ho mathaka ao.

⁷⁴ Empa hoba a ba talime lifahlehong! E mong, a le mocha ’me bocha bo relimolohile; e mong, e le motsofe o maphutha; ka nako ha Johanne . . . ka nako ha Petrose le Johanne ba nyolohela khorong. O bone ntho ho monna e mocha eo. Ke hore, ho tlerefala ho fetisang ho tloaelehileng. O bone tlas’ a maphutha le mekhala, ea letsatsi la Galelela le tlabotseng sefahleho sa motšoasi oa khale oa lihlapi, ho ne ho tšoelima “thabo e ke keng ea boleloa, le e khaphatsehang khanya.” O bone ntho e batlang e fapané.

⁷⁵ Le a tseba, Bokreste bo fupile ntho, e etsang hore batho ba shebehe ba fapané. Ke batho ba batle ka ho fetisa lefatšeng lohle.

A hotolla sejana sa hae a se leketlisa.

⁷⁶ Eaba moapostola Petrose, e leng moholo, a re, “Ha ke na silifera le gauta.” Ka mantsoe a mang, “Ha ke khone ho u thusa, ho reka melangoana ena. Ha ke na silifera le gauta, empa seo ke nang le sona!” A tsoa reka ho Eo ea ruileng linotši le menyaka ea veine ea poloko. A sa tsoa khutla, matsatsi a mabeli kapa a mararō pele ho moo, a tsoa Pentekosta, moo ntho e sa tsoa etsahala teng.

⁷⁷ ’Me monna e mocha a phasoloha ka “amen” e sefutho e matla a e omela, a mo shalima sefahlehong.

⁷⁸ Ha etsahala’ng? Lehlaahlela leo la kutloelo-bohloko, thekolohelo ea Eo ea itseng, “Na Ke rekolohera ba kulang,” oona Moea oo o ne o ahile pelōng ea motšoasi oa khale oa lihlapi. A re, “Ha e le chelete, ha ke na eona, feela ke tšoere se tlang ho e fapanyetsa makhetlo a limilione tse ngata. Seo ke nang le sona!”

⁷⁹ Joale le hopole, Petrose e ne e le Mojuda, ’me ba rata chelete, ka tlhaho, empa Mojuda enoa o ne a sokolotsoe. E seng, “Seo ke nang le sona, ke u rekisetra sona.”

⁸⁰ Empa, “Seo ke nang le sona, ke u neha sona! Seo ke nang le sona! Ha ke a nokela peni mokotleng oa ka. Ha ke khone ho reka senkhoa sa bohobe. Ha ke khone ho reka letho. Ha ke na le sente. Empa ha u ka e amohela, seo ke nang le sona, ke tla u neha sona hobane le ’na ke se neiloe.” Ke sona seo re se hlokang. “Seo ke nang le sona, ke u neha sona.”

“U na le eng, monghali?”

⁸¹ “Ke tsoa ho Ea rekisang lebese le linotši, u sa reke. Ke tla u neha Sona. Ha u a nama ho ’na ka letho bakeng sa Sona. Ha u ka Se amohela, nka u neha Sona. Ha se joaloka ea lefisang, empa joaloka ba fanang.”

⁸² Hobane, “E re ka ha le amohetse lefeela, le nehele lefeela.” Taelo ea Morena oa hae e ne e tsoile, matsatsi a mararō feela pele ho moo. “E-eang ka lefatše lohle, le bolele Evangel. Ea lumelang ’me a kolobetsoa o tla bolokeha; ’me ea sa lumeleng o tla tsuoa. Mehlolo e tla teela ba lumelang hare ke eona ena: Ka Lebitso la Ka ba tla leleka bademona; ba tla bua lipuo tse ncha; ha ba noa lintho tse bolaeang, li ke ke tsa ba etsa letho; ha ba tšoara linoha, e ke ke ea ba hlopha. Le neiloe lefeela, le nehele lefeela.” Mojuda eo o ne a fetotsoe. [Moena Branham o kokota hane sefaleng—Mohl.]

⁸³ Seo re se hlokang Amerika ke phethoho, ea Moea o Halalelang ho nka sebaka sa meetlo ea rōna ea borapeli. “Le neiloe lefeela, le nehelane lefeela.”

⁸⁴ “Seo ke nang le sona, ke u neha sona: Ka Lebitso la Jesu Kreste oa Nazaretha, ema u tsamee”; tumelo Lebitsong le sa silafalang leo la ’Mopi! Ha ho makatse a tlohile a tlolaka a qhomaka ka thabo, ’me a roris Molimo!

⁸⁵ Oh, le tseba lintho tse khōlō, e ka ba e sa le a lutse mono lilemo tse mashome a mane, a leka ho boloka chelete e lekaneng ho reka melangoana ea mofuta, empa ha a khona. Empa hantle nqalong e sa lebelloang ka ho fetisia, le ka nako e sa lebelloang, le batho ba sa lebelloang ka ho fetisia, ba haelloang, a fumana seo a se batlileng. Ke thabetse Molimo ho e sebetsa ka tsela eo.

⁸⁶ ’Me sehlopha sa bathoana, ba bitsoang bathethehi-bahalaleli bosiu bo bong, ke fumane seo ke se batlileng, seo chelete e beng e ka sitoa ho se reka. Har’ a sehlopha sa ba sa rutehang, ba sa balang, ba apereng liaparo tsa theko e tlase, Manegro, le ho qala, kantle koana salunung ea khale e fetotsoeng, holim’ a mokato, ka fumana theko, lehakoe; nakong eo ledaki leo la khale le nchebang sefahlehong, le re, “Na u amohetse Moea o Halalelang ho tloha u lumetse?” Oh, E ne e le ntho eo ke neng ke e batlide. Ke sa lebella ho E fumana har’ a batho bao, empa ba ne ba tšoere seo ke neng ke se hloka.

⁸⁷ Mokhatlo oa U.N. kajeno, ba ke ke ba amohela seo re se tšoereng, empa ke sona seo ba se hlokang. Khrushchev, ba bang bohle ba bona, ba hloka Kreste, ka kolobetso ea Moea o Halalelang. E tla fetola moloho oa bona. E tla etsa hore banna, bao ba ba hloileng, e be baena. E tla tlosa meharo, le lonya le khang; le ho kenya lerato le thabo, le khotso, molemo le mohau.

⁸⁸ E, linqalong tse sa lebelloang, ka linako tse ling u fuoa seo u se batlang.

⁸⁹ Bana ba Iseraele ba ka be ba nehelane ka’ng (likhapo tsohle tsa Egepeta) mohla melomo ea bona e lutlang mali, athe leleme

la bona le leketlile kantle ho molomo? Ba ne ba ka nehela gauta eohle le likhapo tseo ba li hapileng ho Baegepeta, ho noa hang metsi a monate a mapholi. Baetapele ba bona ba lehoatata ba ba tlositse qanthaneng ho ea qanthaneng, ho tloha likoting ho ea melapong, empa li ne li omme tsohle.

⁹⁰ Eaba e a fihla, ho se chelete kapa ho se ho reka! Puo e buileng le moporofeta e re, “Bua le lefika,” ntho e ommeng ho fetisa nahathote, ntho e hole le metsi ho fetisa. Teng lenyora la bona la timoloa, ba se na chelete kapa ba se na ho reka. “Bua le lefika.” E seng lefa lefika, empa “bua le lefika.”

⁹¹ E sa ntse e le Lefika bosiung bona. Ke Lefika naheng e nyoriloeng. Ha u tsamaea naheng e nyoriloeng, bua le Lefika. Ha u a tlameha ho Mo lefa; bua le Eèna. ’Me Ke thuso e leng teng nakong ea tlokotsi. Ha u kula, bua le Lefika. Ha u kulisoa ke sebe, bua le Lefika. Ha u khathetse, bua le Lefika.

⁹² Le a bona, e ka re a ka hlaha hohle feela . . . E ne e shebeha, haeba metsi a le sieo tlase litšeng tsa melapo, metsi a ke ke a fumanoa holim’ a thaba eane, lefikeng. Molimo o etsa lintho ka seetse hole le mohopolo oa motho. Lefika, tulo e omileng ho fetisa nahathote, empa O itse, “Bua le Lefika.”

⁹³ Kajeno, batho ba thetsitsoe haholo. Ba hopola ba ka tloha ba ea etsa merapelo ea bona, ho lefa moprista ho ba etsetsa merapelo e ’maloa, ho lefella tsela ea bona. Ha ba ka haha kereke e itseng e khōlō nqa e ’ngoe, ’me monna ea itseng oa morui a e tšehtesa, ho tloha a iphelela ka takatso, a fumane monna ea mo rapellang, o e hopola e le eona. Molimo ha o batle chelete ea hao e litšila. [Moena Branham o kokotile hararō sefaleng—Mohl.] Sohle seo O se batlang ke boinehelo ba hao le bophelo ba hao ho buisana le Eèna. Molimo o u file chelete, u se ke ua e ntšetsa lintho tse sa kholiseng. E ntšetse lintho tse kholisang. Empa ho hlahisa khotsofalo ea sebele, u ke ke ua e fumana pele u bua le Lefika.

⁹⁴ O hlasisitse metsi a tlisang bophelo, ho se chelete kapa ho se ho reka. ’Me ba noe, ha noa le likamele tsa bona, ha noa le bana ba bona, ’me le joale seliba sa ’na sa phalla nahathote.

⁹⁵ ’Me le kajeno Ke Lefika, naheng e nyoriloeng ena, ho batho ba timelang. “Ea lumelang ho Eèna a ke ke a timela, empa o na le Bophelo Bosafeleng.”

⁹⁶ Lemohang, Bosiu bo bong le bo bong, ba sa tlameha ho belaela ka bohobe. Ba tliselitsoe bohobe, bosiu ka bosiu, bo le bocha.

⁹⁷ Kajeno re tloha ho ea reka senkhoa sa bohobe. Ha u le moköpi, u ea levenkeleng mona, le ho re, “Ke lakatsa senkhoa sa bohobe.”

⁹⁸ O tla re, “Mpontše, pele, kotara ea hao. Ke tšoanelā ho fumana lisente tse mashome a mabeli le metso e mehlano nqa senkhoa sena sa bohobe.”

⁹⁹ ’Me u fumaneng hoba u bo thole? Taba ena e batla e fapohile mocha, empa u theohetse nthong e tlase ka ho fetisa e ka hlahisoang ke koro. Ba e honya e—e livithamini tsohle, litlheferetsi tsohle, ba li tsella kolobe. Ba fehla motoho ho momahanya litlheferetsi ’moho, ba e sefa, ba pheha senkhoa sa bohobe, se entsoeng ke matsoho a litšila, a tšila, hangata. Na le bona seo le se fumanang bohobeng ba lōna, ka linako tse ling, seshoba sa moriri, le lintho tse hanang hloeko, le likotoana tse hariloeng, le sohle se oelang mabakeng ao. Batho ba tletseng sebe ba tšoeroeng ke mafu a venereale, le ntho e ’ngoe le e ’ngoe, e futsoeloang ka mono. Ha u ka bona ha bo etsoa, u ke ke ua bo ja. ’Me, koana, u lefa lisente tsa hao tse mashome a mabeli le metso e mehlano kapa ha u bo fumane.

¹⁰⁰ ’Me Molimo o ba fepile bosiu ka bosiu, bohobe bo futsoetsoeng ke matsoho a Mangeloi; ba se na chelete, ba se na ho reka. ’Me, kajeno, bohobe boo bo ne bo bapisa Kreste, Bophelo ba moea, bo theohileng Leholimōng, ho nehēla Bophelo ba Hae.

¹⁰¹ ’Me Molimo o neha bana ba Oona, letsatsi le leng le le leng, boiphihlelo bo bocha. Le hopole, e ne re ha bo robatsa, bo ne bo puta.

¹⁰² Le utloa motho a bua taba, “Be, ke na le...Ke tla u bolella. Ke Moluthere. Ke Mopresbeteriene, Mobaptise. Ke Mopentekosta,” ke senkhoa sa khale feela sa bohobe bo lubiloeng ka letsoho. Ke phetho, se litšila hakaalo feela, ’me se lubiloe ke matsoho a batho.

¹⁰³ Empa ha u utloa bopaki ba boiphihlelo, bo bocha, “Hoseng hona, thapelang, Moea o Halalelang o kolobelitse moea oa ka bocha,” oh, moena, tseo ke Lijo tsa Mangeloi. O li fepa bocha, letsatsi le leng le le leng, ho tsoa Leholimōng.

Phororo tsa mahlohonolo re a li hloka.
Marotholi a mohau a re nelang kahohle,
Empa re kōpa phororo tsa mahlohonolo.

¹⁰⁴ Oh, e, li romele li tsoa Leholimōng, li le ncha, Morena, Kreste Bohobe ba Bophelo. Bo lahlele pelōng ea ka, ntumelle ho thabela Boteng ba Hae bo boholo.

¹⁰⁵ Ehlide, ba ne ba leboha. Ba le motlotlo. Monna ofe kapa mosali ea tsoetsoeng ke Moea oa Molimo, ’me a amohela Moea o Halalelang, o tla leboha kamehla. Ho sa tsottelehe se etsahalang, u tla ba motlotlo.

¹⁰⁶ Joaloka mothoana, moshanyana oa sefou lithabeng, Benny e monyenyan, o ne a hlahile. Ha a batla a le likhoeli tse robeli, lera la qala la sira mahlo a hae. Batsoali ba hae e le bafutsana. Ba lula pel’ a leralla la khale la letsopa. ’Me ba tsebile hoba karo eo e ka

pholosa mahlo a Benny e monyenyan, a tle a bone. Joale e batla e le moshanyana oa lilemo tse leshome le metso e 'meli. Batsoali ba hae ba kolla ntsi hanong feela ho reka bohobe ba bona le nama ea selemo. Ba ke ke ba khona ho lefella karo.

¹⁰⁷ Baahisane bohole, 'moho, ba bone Benny e monyenyan a leka ho bapala le bana kantle mane, a foufetse. A sa bone seo a se etsang. Ba utloa bohloko. 'Me e mong le e mong, selemong seo, a boloka sejalo se phaellang. Ba sebetsa ka matla a fetisang har'a mahlaseli a letsatsi. 'Me ea re ha lijalo li rekisoa mariha, ba nka chelete ba palamisa Benny e monyenyan terene, 'me ba mo romela ngakeng.

¹⁰⁸ Eaba ba fetisa karo ka katleho. 'Me mohla a khutlileng, baahisane bohole ba phutheha ha Benny a theoha tereneng. Mahloana a hae, a phatsima a hlakile. A qala a hooeletsa a lla, ha a shalima lifahleho tsa bona.

¹⁰⁹ Molaoli e mong oa terene a re, "Mora, karo eo e u jele bo kae?"

¹¹⁰ A re, "Mohlomphehi, ha ke tsebe na e jele batho bana bo kae. Empa ke thabetse ho bona lifahleho tsa bona, bao ba lefileng moputso."

¹¹¹ Re ikutloa joalo. Ha ke tsebe na E jele Molimo bo kae. Ke a tseba O nehelane ka bokhabane ba Oona bo fetisisang, Mora oa Oona. Empa ke thabile haholo ho fuoa pono ena ea moea, ha ke khona ho Mo talima sefahleho ho tseba hobane O nchoetse. Ha ke tsebe E Mo jele bo kae. Ha re na mokhoa ho akanya. Moputso o moholo haholo. Nke ke ka le bolella na e joang. Empa ke leboha haholo. Ke motlotlo, ha e le moo, ke na be ke foufetse, joale ke a bona.

¹¹² Ke motlotlo ha e le moo mohla Baena ba Mayo ba mpolellang hobane nako ea ka e felile, mohla lingaka li ne li mpolella ke sa tl'o hlola ke phela hape, lilemo tse mashome a mabeli le metso e mehlano tse fetileng, ke a phela kajeno. Ha ke tsebe na e qositse Molimo bo kae, empa ke leboha hobane ke a phela.

¹¹³ Ke na be ke le moetsalibe, ke tlamiloe ke sebe, lipelō li opa, ke tšaba lefu. Empa, kajeno, lefu ke tlholo ea ka. Alleluia! Le tla nkisa feela ka pel'a Sefahleho sa Eo ke mo ratang, ke tle ke shalime sefahleho sa Hae. O fetotse ntho eo, ka karo, A tšoara pelō ea ka a e nchafatsa. Ke a tseba ntho e etsahetse ho 'na.

¹¹⁴ Pampiring ea mariha a fetseng ana, koana Minnesota, hoseng ho hong moshanyana o ile a palama baesekele ea hae a ea kerekeng, sekolong sa Sontaha. Mohlankana e mong tikolohong, a sa batle ho amana le sekolo sa Sontaha ka letho, eaba o intša le kharebe ea hae ho ea thellisa lehloeng. 'Me e le monna ea holileng, a fihla a oela lehloeng le le sessane. A ile a tšeja moshanyana hoseng hoo ha a theoha ka tsela, a bolella kharebe ea hae, ho re, "Kereke eo e kenoa ke mphi ea mahlanya." 'Me ha hlohomela lehloeng, keha kharebe ea hae e le hojana le eëna.

O ne a le bobebe; a phonyoha. Empa ha a nyoloha 'me a beha liphaka tsa hae lehloeng, o ne a shoele bohatsu, 'me a leketla holim'a leqhoa.

¹¹⁵ Kharebe ea hae ea leka ho mo nanabela, a mpa a le boima haholo, a ntse a pshatla leqhoa. A mo hooeletsa, "Khutla! Khutla! U tla hohlomela, re tla noela bobeli ba rōna." A hooeletsa, a lla, 'me ho se letho ho mo thusa.

¹¹⁶ Ka mora nakoana, qhooeng ea leralla koana, ha hlaha baesekelenyana, e ntse e sokoa, moshanyana a khoacetse Bibebe tlas'a sephaka. A utloa lillo, eaba o potlakisa baesekele ea hae. Ho beha Bibebe ea hae fatše, le ho tsoa a matha holim'a leqhoa. A khasa ka mpa ea hae, a apere liaparo tse ntle, a ba a nanabela liphaka tsa monna, a 'na a mo hula, ho fihlela a mo ntšitse leqhoeng. Ho matha a hoehla koloi. Ba laetsa amalanse ba mo isa kokelong.

¹¹⁷ Hoba a tlohe a lefe amalanse, a lefe lingaka liente tsa pneumonia le lintho tseo a li sebelisitseng, a atamela moshanyana. A re, "Mora, ke namile ho uena ho le ho kae?"

A re, "Letho."

¹¹⁸ A re, "Ke u namile bophelo ba ka." E nahane. Chelete e sitiloe ho e lefa. E ne e le bophelo ba hae.

¹¹⁹ Re tlameha ho ikutloa joalo nqa Molimo. Ha se ho reka tsela ea rōna ka ntho e itseng; empa re namile Molimo maphelo a rōna, hoba re ne se shoa re teba sekoting sa sebe. 'Me Molimo oa nkoahela ka liphaka tsa Oona le ka kobo.

Ha ke teba botebong ba sebe,
Leliboho la khotsa le le hole,
Likoli tse ntebieng li ntakile,
Ho teba ho se hhole ke tsoha;
Empa Morena oa leoatile
A utloa sello sa ka se nyarosang,
Teng a mphahamisa metsing,
Joale ke bolokehile.

¹²⁰ Ke molato oa bophelo ba ka ho Oona. O molato oa bophelo ba hao ho Oona. O molato oa bophelo ba hao ho Oona, ho Mo sebeletsa; e seng ho fana ka bona, ho tsamaea hohle o iphafa ka kereke ea bolumeli ba hao; ha se ho tloha u seholla ba bang; empa ho leka ho sebeletsa le ho pholosa ba bang, le ho leka ho ba fihlisa tsebong ea Morena Jesu Kreste.

¹²¹ Mora ea lehlasoa. Ho koaleng, nka bolela sena. Hoba a senye lefa la hae lohle, lefa la ntate, ka ho phela bohlasa, 'me mohla a khutlelang hae... O ne a robetse serobeng sa kolobe, eaba o a iphumana. 'Me o itse, "Basebeletsi ba thapiloeng, ba ntate ba ba kae, bona ba salloa, ke 'na enoa ke a shoa, ke tlala." Hola a leka ho re, "Ke a ipotsa ebe ke tšoere cheletana ho boela ke lefa

ntate (ke e nehetse ka bohlasoa) ka eona?” Empa o tsebile semelo sa ntatae, ’me o itse, “Ke tla tsoha ke ee ho ntate.”

¹²² Ntate ha a re, “Bea butle, mora! Ana u khutlile le chelete ea ka?” Che. Ha a mo qosetsa libe tsa hae. A thabetse ha a khutla. A thabetse ha a ikhopotse, ka ha e ne e le mora oa hae. E le ngoana hae ka sebele. A thabile hoba a le tseleng ea hae e khutlelang hae. Joale, ha a ka a chaella sebe sa hae, a mpa a thabetse ho ikhopola ha hae le ho re, “Ke sitetsoe Molimo oa ka, le ntate oa ka. Ke tla tsoha ke ee ho eèna.”

¹²³ ‘Me hoba a mo bone a sa le hole, koana, a mo titimela a mo aka. ‘Me a re, “Hlabang namane e nontšitsoeng,” le se na chelete. “Tlisang kobo e ntle ho fetisa,” le se na chelete. “Tlisang lesale,” le se na chelete, “le kenyeng monoaneng oa hae. A re jeng, re noeng, re thabeng, hoba enoa mora oa ka o na be a lahlehile joale o fumanoe. O na be a shoele, ’me o boetse o a phela. A re thabeng ke hona.”

¹²⁴ Na nka bua sena metsoalle, ho koala. Eona feela ntho e kholisang, eona feela ntho ea sebele e leng teng, tsona feela lintho tse lòkileng, ha li rekoe ka chelete. Ke lineo tsa Molimo tsa lefeela, ka Jesu Kreste: pholoso ea moea; thabo. Tloong le je, le be le khorisoe.

Horeng u ntsetsa ke'ng seo e seng lijo chelete? le ikhathaletsa ke'ng se sa kholisang? mame lang hle, 'me le tla ja... se monate, mee ea lôna e ithabise ka tse nonneng.

Sekehang litsebe, le tle ho 'na: mame lang, mee ea lôna e tle e phele; 'me Ke tla le sitsa ka selekane sa kamehla sa mehau e tiileng, e baletsoeng le Davida.

¹²⁵ Lintho tsohle tse hlolang, lintho tsohle tse molemo, lintho tsohle tse hlabosang, lintho tsohle tsa Bosafeleng, li tlide feela, ’me ha u lefisoe letho. Qetellong ea mongolo oa Buka ena, E itse, “Ea batlang, a tle a noe liliba tsa Metsi a Bophelo, feela,” le se na chelete, le se na ho reka. Le ntsetsang lintho tse sa khoriseng chelete ea lôna, la lesa lintho tse khorisang, tsa feela, li iphetela u sa ka oa li baballa?

A re rapeleng.

¹²⁶ Le sa khutsitse le lutse thapeleng, na o teng, ka moahong ona, hoseng hona, bao ba sa noeng Selibeng seo, litakatso tsa lefatše li sa ahile bophelong ba hao, ’me u rata ho fetola nqalo eo u noang ho eona, hoseng hona, kapa tsebeliso ea chelete ea hao? U rata ho tla tla reka ho Molimo, (u se na chelete, u se na ho reka), linotši le lebese, menyaka ea veine? Na u ka phahamisa letsoho la hao, ho re, “Nkhopole, Moena Branham, u sa rapela”? Molimo a u hlohonolofatse, monghali. Molimo a u hlohonolofatse, monghali. Molimo a u hlohonolofatse, khaitseli. Na ba teng ba ka reng, “Nkhopole, Moena Branham, u sa rapela”?

¹²⁷ Ba bang ba lōna bacha, yaa, le sentseng bophelo ba lōna. E—e—e lihora tseo 'mè a li qetileng a le rapella, le ntate, thuto eohle eo u e rutiloeng, 'me koana u e latotse, ho mamela mohoeshetso oa diabolosi. Joale u lakatsa 'mino oa lefatše, lintho tsa lefatše. 'Me u ikhopola, joaloka ngoana ea lehlasoa serobeng sa kolobe. Na u ka rata ho phahamisa letsoho la hao, khaitseli, moena, le ho re, "Molimo, nkhopole. Nke ke ikhopole, hoseng hona, ke khutlele tlung ea Ntate"? Ha e u qose ntho le e 'ngoe. O emetse uena. Ho sa tsottelehe na u entse'ng, "Leha libe tsa hao li ka ba khubelu joaloka sekarelata, li tla soeufala sa leholoa; khubelu joaloka krimsons, li tla soeufala joaloka ka boea ba nku." Na u teng ea ka pel'a Sefahleho se Khethhehileng, ea ka ratang ho phahamisa letsoho la hae?

¹²⁸ Ba kulang le ba hlokang, ba re, "Ke—ke uetse sekoting. Satane o—o ntlhahiselitse bobe. O nkholofalitse a nkulisa, kapa se seng. Ke a lakatsa, hoseng hona, lehlaahlela la Molimo la tumelo le kene pelōng ea ka, le tla nkhula sekoting sena, joaloka monna khorong e bitsoang e Lōkileng." Phahamisang matsoho a lōna. Molimo a le hlohonolafatse, e mong le e mong.

¹²⁹ Morena, ke tlisa ho Uena, horeng ena, bao ba phahamisang matsoho a bona, bakeng sa tšoarelo ea libe tsa bona. Uena u Molimo, le Molimo o inotši. Hantle moo ba lutseng joale, ke hona moo U buileng le bona. Ke hona moo U ba kholisitseng ka phoso ea bona, Lentsoe la fumana malulo a Lōna, le Moea o Halalelang oa qala oa bua, le ho re, "U phoso. Phikoloha, u khutlele ho Molimo Ntate hape." 'Me ba phahamisitse matsoho a bona, ho itšupa ba batla ho tsoa serobeng sena sa lefatše sa kolobe, ho khutlela tlung ea Ntate, teng ke nala, moo ba sa t'l'o tlameha ho tlisa letho. Joaloka seroki ha se buile ka tšoanelo, "Ke tla ke le feela, ke mpa ke itšoarella sefapanong sa Hao." Ba ke ba tle, ka mosa, boikokobetso, 'me ba ahloloe, 'me ba nehele maphebo a bona. 'Me U tla tlisa kobo e ntle ka ho fetisa; le lesale, ho le kenya menoaneng ea bona; le ho ba fepa Manna a Konyana e hlabiloeng. Aba seba, Morena.

¹³⁰ Ba teng ba kulang le ba mahlomoleng. Ba hloka. Satane o ba lihetse sekoting, ntle le pelaelo, ha ba na chelete ea likaro. Ntle le pelaelo, mohlomong, boholo ba bona ha bo a khona ho etsoa karo. E ka ba ngaka e hlotsoe ho tlosa sesosa, le holane chelete ea hae e ne e lekane. Empa Uena u Molimo. 'Me ke rapela horeng eona ena, tlas'a tlolo ea Moea o Halalelang o lutseng o le teng joale, hore U tle u folise e mong le e mong oa bona. Ba ke ba folisoe, ho qala hloohong tsa bona ho isa maotong a bona, ka bottlalo.

¹³¹ Haeba ba se na thabo; poloko ea bona, ha ba sa hlola ba E thabela. Joaloka Davida oa mehleng, ha a buile, "Khutlisa thabo ea poloko ea ka." Ba fuoe thaba le nyakallo, sebakeng sa tšarelo le mokhathala oa bona, hoba Uena u Lefika naheng e nyoriloeng. U lehaha ha sefeso se e tla. Mohla diabolosi a ba kurutletsang ka

maloetse a mang le a mang le limisale, U lehaha ha sefefo se e tla. Ho be joalo, kajeno, Molimo, hoba re e kōpa ka Lebitso la Jesu. Amen.

Jesu, o ntse a bitsa, ka lerato,
U bitsa uena, le 'na;
Leha re sitiloe, O lereko o tšoarelo,
Tšoarelo ho 'na le uena.

Tloong hae . . .

¹³² Joale ha u batla joalo, ho nyolohela aletareng ho khumama fatše, re ka u rapella, ho u tlotsa, sohle seo re ka se etsang. U amohetsoe.

. . . khathetseng, tloong hae;
Jesu, o ntse a bitsa, ka lerato,
Baetsalibe, tloong, hae!

¹³³ Le a Mo rata na? Teddy, na u ka re fa lehlaso, "Ke a Mo rata, ke a Mo rata hoba A nthatile pele." Na u ka se khona?

¹³⁴ A re se bineleng tlottlisong ea Hae, pele re fetola tsamaiso ea tšebeletso, nakoana feela. Ena ke thoriso. Molaetsa o tsoile. Ke thabile haholo ha le O amohetse. Ho rapela hore O tla le etsa hantle, hoba ho bile monate ho 'na ho O tlisa. Ke rapella pululelo e neiloeng 'na, e le boelle Oona, le tle le O amohele ka pululelo eo O rometsoeng ka eona. Morena a O sitse pelōng ea lōna. Ke hantle.

Ke a Mo rata,

Joale koala mahlo a hao feela, re sa bina. Phahamisa matsoho a hao.

Ke a Mo rata
Hoba A nthatile pele
Le ho lefella poloko ea ka
'Fateng sa Kalvari.

¹³⁵ Joale a re inamiseng lihlooho tsa rōna, re se binele ka marameng. [Moena Branham o qala a binela *Ke A Mo Rata* ka marameng—Mohl.] Le a Mo rata na? Ana Eèna ha se sebele pelōng tsa lōna? Ana ha ho selo ka Eèna, e leng sa sebele ruri? Ke a Mo rata hoba A nthatile pele, a lahlela khole ea Bophelo e tsoang Kalvari, ho E hokela pelōng ea ka.

¹³⁶ Le se lebale, Moena Drummond o tla re rerela bosiusing bona, bosiu ba selallo. Ha le rata Morena, theohang le je selallo le rōna. Ha Morena a ratile, ke tla ba le lōna mona. Eo ke mokhoenyana oa Moena Tony Zabel; Moena Thom ho tsoa Afrika; mora oa hae, moshanyana ea khabane; ea lōkileng ruri, Mokreste oa makoma, morerinyana ea motle.

Hoba A nthatile pele
Le ho lefella poloko ea ka
'Fateng sa Kalvari.

¹³⁷ Re sa inamisitse lihlooho tsa rōna joale, piano e tsoelapele ho letsoa.

¹³⁸ Morena Jesu, re ikemisetsa ho kenela tšebeletso e 'ngoe, Morena. Re U leboha ka Moea o Halalelang o buileng le lipelō tsa rōna. 'Me re thabile, Morena, ha U re etselitse sena. 'Me Lentsoe la Hao le ke ke la khutlela ho Uena le le feela, Le mpe le finyelle seo Le se baletsoeng. Le ke le lule lipelōng tsa rōna tsohle, re ntse re tseba hobane lintho tsohle tse tileng le lintho tse hholang kamehla li tsoa ho Molimo, ha li tle ka chelete, ha li tle ka ho reka. Hobaneng re ka loanela lintho, ra e fetola taba e lipakeng tsa bophelo le lefuu, ka lintho tse tlang ho timela? Re ke re loanele ho feta, Morena, lintho tse ke keng tsa timela, tse ke keng tsa rekoo. Theko e lefiloe feela, le memo ea ho tla, "Ea batlang, a tle."

¹³⁹ Hlohonolofatsa tšebeletso e hlahlamang ena. Aba sena, Morena. Kōpana le rōna bosiusing bona. Hlohonolofatsa tšebeletso ea kolobetso. Tšoloh e khōlō e be teng. Batho bana, ba tlang ho kolobetsoa ka Lebitso la Mora oa Hao ea ratoang, Morena Jesu, ba tlatsoe ka Moea o Halalelang. Batho bana, ba phahamisitseng matsoho a bona, ho baka, hoseng hona, libeng tsa bona, ba ke ba tle, ba apare liaparo tsa kolobetso, le ho kena letšeng, ho pakela lefatše hobane ba tšoaretsoe libe tsa bona. 'Me ba kolobetsoa, ba tle ba li leballoe bukeng. Aba sena, Morena.

¹⁴⁰ Eba le Moena Drummond bosiusing bona a sa re tlisetsa molaetsa, o mocha ho tsoa Teroneng. Mo tlotse ka Moea o Halalelang. Le ho lula le rōna ha re ja selallo. Lipelō tsa rōna li hloke li hloke sekoli, ho se fihleloe tšilafalo ka ho rōna. Mali a Jesu a re hlatsoe sebeng sohle. Aba sena, Morena. Leleka maloetse har'a rōna, le ho re fa thabo le khotso. Ka Jesu Kreste re a e kōpa. Amen.

Ke a rata . . .

¹⁴¹ Le a Mo rata na? Joale le Mo phahamisetse matsoho a lōna.

Ke a Mo rata

Ho- . . .

Joale otlollla letsoho le tsukutlane le motho ea haufi le uena.

. . . pele . . .

(Russell, ke a Mo rata. Ha nka shoa kajeno, ke a Mo rata.)

Le ho lefella . . .

Ke hantle, le otolle le tsukutlane ka matsoho hantle ka mahohle.

. . . poloko

Mane Kalavari . . .

Ho lokile, Moena Neville, ka lentsoe la hae. Ho lokile.



LE SE NA CHELETE KAPA LE SE NA HO REKA SST59-0802
(Without Money Or Without Price)

Molaetsa wona, ka Moena William Marrion Branham, o reriloe sethathong ka Senyesemane, Sontaha hoseng, Phato 2, 1959, Branham Tabernakel, Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org